

衆邪異道却諸邪見行抑制衆魔斯如來印
則爲精修如來之法諸族姓子便當分別求
此法印究竟正見佛說如是王阿闍世濡首
童真彌勒大士一切菩薩諸大聲聞舍利弗
大迦葉須菩提阿難等諸天世人阿須倫聞
佛所說莫不歡喜

晉超三昧經卷第四

佛說放鉢經

即普超經第三品別譯

安公錄失譯人名開元附西晉錄

佛在舍衛祇洹精舍時與諸菩薩無央數比
立比丘尼優婆塞優婆夷諸天王釋梵及阿
須倫鬼神龍諸人非人無央數悉會坐佛說
菩薩法無央劫勤苦泥犁禽獸薜荔一切憂
勞十方布施金銀珍寶車馬奴婢及妻子頭
目肌肉皆不愛惜用施十方人勤苦故時忉
利天上二百天子前世作菩薩道未堅在佛
所聞求道勤苦皆念道劇難得心便轉求羅

卷四

十五

漢辟支佛道佛知是諸天子意欲轉便化作一人端正無比令持百味飯至佛所前長跪叉手作禮白佛言願佛哀我受此飯佛便受之座中有菩薩在佛前坐字文殊師利白佛言當念故恩座中諸菩薩悉聞展轉相問文殊師利前世有何等恩施於佛而復欲得佛飯佛即捨鉢于地便下入地中乃至賴毗羅耶佛刹刹名波陀沙鉢懸止空中現彼刹中諸菩薩見之起前長跪白佛是懸鉢從何所來亦不墮地彼佛言且待須臾當見菩薩威

神變化爾時釋迦文佛告摩訶目犍連行求索鉢摩訶目犍連即入八千三昧徧入八千佛刹視不見即還白佛言求索鉢了不知處佛告舍利弗汝復行求索舍利弗入萬三昧下行過萬佛刹求鉢不得即還白佛言我下行過萬佛刹求鉢了不見佛復令摩訶迦葉行求索鉢摩訶迦葉便入萬二千三昧復下過萬二千佛刹求索鉢不得還白佛言我求索鉢了不見舍利弗白彌勒菩薩言仁者高才功德已滿智慧備足次當來佛當知鉢處

彌勒菩薩語舍利弗言我雖次當來佛功德成滿其行具足不如文殊師利菩薩譬如十方恒邊沙佛刹滿中萬物草木及爾所菩薩不能知佛一步之中所念何等文殊師利菩薩知深三昧獨文殊師利菩薩能知佛鉢處

段四

十六

舍利弗即起前至佛所長跪叉手白佛願令文殊師利菩薩行求索鉢佛語文殊師利汝行求鉢來文殊自念舍利弗當不起於座而致鉢來即入三昧譬如日出光明無所不照菩薩入三昧者十方無所不至文殊內手從

袈裟裏下探過十佛刹手指諸節其一節放千萬光明出一光明端各有一蓮華蓮華上有一菩薩坐皆如文殊其下刹有佛蓮華上菩薩者皆持釋迦文佛聲謝諸佛復持文殊聲遙爲諸佛作禮如文殊手逮至賴毗羅耶佛刹刹中諸菩薩白佛言是手何等亦不見邊亦不見際賴毗羅耶佛語諸菩薩言上無數佛刹名沙訶樓陀佛號釋迦文前有坐菩薩字文殊最尊光明智慧難可當作變化如是諸菩薩白佛言今我等欲共得見釋迦文

及文殊賴毗羅耶佛即放額上千億光明出
照中央無數佛刹一至釋迦刹諸菩薩問佛
今有是大火光煙出須臾頃便火出是大泥
犁火耶佛言莫作是語是非泥犁火釋迦刹
名沙訶樓陀是中火也諸菩薩問佛言是沙
訶樓陀刹者何因名沙訶樓陀有是火佛語
諸菩薩沙訶樓陀刹者雜惡三毒婬洩瞋怒
愚癡諸菩薩白佛言沙訶樓陀刹中諸菩薩
忍辱不瞋怒者作是爲可佛語諸菩薩釋迦
刹中人罵詈菩薩輕易撻捶者菩薩忍辱終

毀四

十七

不加瞋怒慈哀十方人欲令度脫皆是菩薩
威神所加菩薩忍辱之恩故名沙訶樓陀諸
菩薩白佛言我等聞是大歡喜得不生釋迦
刹弊人之處賴毗羅耶佛告諸菩薩莫說是
語不可沙訶樓陀刹中諸菩薩意佛言我爲
汝曹說東方佛字頭意刹名訶波離摩坻陀
怛頭意佛刹中菩薩行六度悉具足不如沙
訶樓陀刹中菩薩行六度一日一夜念十方
勤苦皆使度脫何以故沙訶樓陀刹中作行
勤苦譬如一佛刹壞敗時火燒其刹有人著

新衣從東方來入火中從火中至西方其身
出不燒是難不諸菩薩言甚難天中天佛言
沙訶樓陀刹中菩薩一日一夜所行罵詈輕
易之菩薩忍辱終不瞋怒譬如人行火中
身不燒之難尚不及是菩薩若百倍千倍萬
倍億倍諸菩薩等二萬人前白佛願欲上至
沙訶樓陀刹供養釋迦文佛及文殊師利菩
薩等賴毗羅耶佛語諸菩薩若欲至沙訶樓
陀刹者先治汝意譬如地得香華好物不喜
得屎尿涕唾膿血惡露亦不瞋佛言我何因

爲若曹說是語釋迦文佛刹中有菩薩先世
多供養諸佛者人有急性者意善之事但口
教急用今世惡故諸菩薩白佛言沙訶樓陀
刹諸菩薩先世多供養諸佛求道久何緣
生沙訶樓陀弊惡人處佛告諸菩薩有二因
緣今世生沙訶樓陀刹本前世與釋迦文佛
俱行索佛故世世相隨復有菩薩宿命有惡
不盡故生彼惡世諸菩薩白佛今是諸菩薩
生沙訶樓陀刹何因緣得除宿命之惡佛言
善男子善女人生沙訶樓陀刹索菩薩道生

數四

十八

貧家舍用是故除宿命惡又多病者復除宿命之惡又遭遇父母兄弟妻子病瘦死亡憂愁感傷用是故復除宿命之殃又遭逢縣官恐怖棄捐父母家室財產亡逃憂愁用是故復除宿命之殃惡若有一旦失財業窮厄用是故復除宿命之殃惡若在惡國中生本爲他國所攻敗壞奔走愁憂無聊用是故復除宿命之殃惡若生弊惡人中貧賤面目醜陋形癯盲聾不屬逮人父母兄弟妻子宗親皆共憎之是人愁憂用是故復除宿命之殃惡

若聞有善道歡喜欲索明師教告經道開心從受不得明師便愁憂用是故復除宿命之殃惡若復遙聞遠方有師高明智慧通達欲往從受經學身體病瘦手足拘攣不可動搖錢用乏少又無伴侶便不可行念之憂愁用是故復除宿命之殃惡若有人行求善師欲從學受經道師大明達皆知道要弟子愚癡無慧意不開解便自愁憂用是故復除宿命之殃惡若有善師欲教弟子世間之事開語經道弟子愚癡不能忍受便棄捐師去後歸

毀

十九

念師法戒大歡喜意悔愁憂用是故復除宿命之殃惡若有求菩薩道者卧坐夢中見怨家持刀兵追逐怖恐夢中恐懼復除宿命之殃惡若有菩薩道家善男子善女人宿命殃惡未盡死當入泥犁中勤苦一劫得善師教悔過一日一夜各三時經戒不復作惡一日一夜者頭痛身熱諸病悉除盡不復入泥犁中賴毗羅耶佛語適竟文殊師利下手探鉢賴毗羅耶佛刹及中央無央數佛刹上至釋迦文佛刹皆大震動一切人皆令驚怖舍利

弗起前長跪叉手白佛言何因緣震動如是真不驚恐者佛語舍利弗今是地震動者文殊師利探鉢是故震動舍利弗問佛言鉢在何所止佛言鉢乃在下過無數佛刹有佛字賴毗羅耶其刹名波陀沙鉢止是中舍利弗白佛言今諸菩薩阿羅漢及諸天人阿須倫鬼神龍欲見下方賴毗羅耶佛刹及中央諸佛刹欲見文殊師利變化取鉢時佛便放足下百億光明悉照十方無數諸佛刹土如是悉徧見賴毗羅耶佛刹諸菩薩見文殊師利

變化取鉢時諸菩薩天人阿須倫鬼神龍皆
大歡喜諸阿羅漢皆大愁毒淚出各自言菩
薩尚能變化在所作爲乃爾何況佛威神光
明難可當我等寧入泥犁中百劫後出聞菩
薩法便奉行何憂不得我願四賴毗羅耶佛刹
中諸菩薩及中央諸佛刹土菩薩無央數皆
來上至釋迦文佛所諸菩薩各自念言到釋
迦文佛所供養中有菩薩散華覆一佛刹有
菩薩散香有菩薩散天衣有菩薩散金銀珍
寶有菩薩作音樂聲一佛刹中如是諸菩薩

皆前持頭面著地爲佛作禮已却坐文殊師
利菩薩探鉢來出座中諸菩薩阿羅漢諸天
人阿須倫鬼神龍莫不歡喜舍利弗起前長
跪叉手白佛言文殊師利有何等恩施與佛
今何因緣言當念故恩佛語舍利弗乃前世
無數劫時有佛字羅陀那祇有六萬比丘阿
羅漢七億二十萬人諸菩薩中有一菩薩字
怛那羅耶朝起入城分衛得滿鉢來還從街
上行有一乳母抱長者子字維摩羅波休見
沙門持鉢便下乳母抱趣沙門所沙門以石

蜜餅授與小兒小兒噉之大美便隨沙門去
乳母逐護之小兒噉盡盡便還顧意欲還去
沙門復取餅授之兒噉餅遂隨沙門出城到
佛所見佛端正身有三十二相八十種好視
之無厭見諸菩薩比丘大歡喜沙門便教小
兒澡手漱口便持鉢餅與小兒令飯佛汝今
得安隱後得其福小兒即受鉢餅持至佛前
以手接餅著佛鉢中復過與諸菩薩比丘僧
皆悉滿足食飽餅鉢如故如是飯佛菩薩及
比丘僧七日小兒大歡喜自說我日持一餅

飯佛菩薩及比丘僧七日飯滿我必得福因
是一功德得佛佛語諸菩薩阿羅漢言此是
本時恩也怛那羅耶菩薩今文殊是也時小
兒維摩羅波休者我身是今我得佛有三十
二相八十種好威神尊貴度脫十方一切衆
生者皆文殊師利之恩本是我師前過去無
央數諸佛皆是文殊師利弟子當來者亦是
其威神恩力所致譬如世間小兒有父母文
殊者佛道中父母也佛說是經時忉利天上
二百菩薩自念佛本文殊所教化令作功德

佛說放鉢經

成佛文殊何以故在佛前不成佛耶佛言文殊深入善權廣化衆生故未取道佛告諸菩薩及比丘四衆前二百天人菩薩欲悔取二乘者見文殊變化吾應報恩今皆更發無上心修菩薩道後世皆當作佛佛說經已諸大菩薩比丘僧諸天人阿須倫鬼神龍皆大歡喜起爲佛作禮

音釋

懊惱懊鳥皓切惱恨痛也 劇奇逆切 跔知章切 計會會古切 貲量切 漸漬疾二切 放鉢經梵語具云薛荔多此云餓 入下探探他甘切 姪洗余切 內手內奴切 坻坻陳尼切 涕唾涕他計切 拘攣拘朱切 手足拘執切 澡洗也 漱蕪口切